

SANTIAGO gellgangan yachatsicuycuna

Cay cartachö yachatsicuycunata Santiagum gellgangan maytsaychö Señor Jesucristuman criyicog mayincunapä. Payga cargan Jerusalenchö criyicogcunata yachatsicogmi, manam apostol cag Santiajutsu. (Marcos 6.3, Galatas 1.19). Señor Jesucristo wanunganpita manarä cawamuptinga manam paypis criyirganrätsu Tayta Dios cachamungan salvacog canganta (Juan 7.5). Wanunganpita cawariscamuptinmi itsanga criyirgan. Tsaypitaran Santiagoga apostol Pedruwan y apostol Juanwan Israel mayincunata Jesucristupa alli willacuyninta willapäyargan (Galatas 2.9).

Cay yachatsicuycunata Santiago apatsirgan Tayta Dios munanganño runacuna cawayänanpämi. Tsaynö tantiyatsirgan runacuna ñcacuychö cawarpis Tayta Diosman imaypis criyicur cawayänanpä (1.2-18), pobricunata imapäpis mana cuentagcuna juzgacäyänanpä (2.1-13), Tayta Diosman yäracurnin allicunata rurayänanpä (2.14-26), imatapis llutancunata mana parlayänanpä (3.1-12), y Tayta Diosman imaypis mañacuyänanpä (5.13-18). Cay libruchöga mascunapis yachatsicuycunaga gellgaranmi.

Santiagupa saludacuynin

¹ Maytsay marcachö criyicog mayicuna:

Noga Santiago, Tayta Diospa y Señornintsic Jesucristupa sirvegnin carmi, cay yachatsicuycunata gellgamü.

Ima ñacacuchöpis imaypis Tayta Diosman criyicur cawanantsicpä yätsingan

²⁻³ Waugicuna panicuna, ima ñacaychö carpis ama yarpäyaytsu Tayta Dios gongayäshungayquita. Payga imaypis yanapaycäshunquim munangannö cawayänayquipä. Tsaynö yana-paycäyäshungayquita musyaycarga ima nacayta päsarpis llaquicuyänayquipa rантин cushicuyay. ⁴ Tsaynöpam tantiyayanqui imanö ñacarpis Tayta Dios munangannö imaypis cawayänayquipä.

⁵ Tayta Dios munangannö cawayta mana camacäpacurga payman mañacuyay. Mañacuyaptiquega tantiyatsiyäshunquim. Payman mañacur yäracog cagtaga imaypis yanapanmi. ⁶ Diosnintsicman mañacurninga llapan shonguyquicunawan payllaman yäracuypa mañacuyay. Y mañacuy öraga ama yarpachacuyanquitsu: “¿Mañacungäta chasquimangatsurä o manatsurä?” nirnin. Tayta Diosman tsaynö mañacurga lamarta vientu wacläman cayläman lagchicachätsingannömi gamcuna juc rätulla yarpärirga manana yarpäyanquinatsu. ⁷⁻⁸ Diosnintsicman canan yarpärir y waray manana yarparga manam pay munangannötsu cawaycäyanqui. Tsaynö carninga mañacurpis manam ni imata chasquiyanquitsu.

⁹ Señor Jesucristuman criyicog pobricuna, imayniynag cayangayquipita runacuna mana välegpä cuentayäshuptiquipis Tayta Diosga

altuchömi tsaräyäshunqui. Tsaynö caycaptina
pobrilla carpis cushishga cawacuyay.

¹⁰ Capogyog cag criyicogcuna, gamcunapis
cushicuyay rícu cayangayquiman mana
yäracuyänayquipä Tayta Dios tantiyat-
siyäshungayquipita. Rícu cayga tamya tiempu
waytanöpis ushacagllam. ¹¹ Tamya päsariptin
achaywanna wayta cuyayllapä caycarpis
shushur ushacäcuregnöllam rícu runacunapis
ushacäcuringa imaycancunapis mas capuyänanpä
ashiycäyanganchö.

¹² Ima ñacaychö carpis Tayta Diosman
mana ajayaypa mañacogcuna Tayta Dios
aunicungannöllam ñöpanchö imayyagpis
cawayanqui.

*Allillata ruranapä Tayta Dios
yarpätsimangantsicta ningan*

¹³ Pipis jutsa rurayta yarparga ama
yarpäyaytsu Tayta Dios tsay llutancunata
yarpaycätsiyäshungayquita. Tayta Diosga
manam imaypis pitapis jutsata ruratsintsu
ni jutsata rurananpä yarpätsintsu. ¹⁴ Tsayga
manam tsaynötsu. Quiiquicunam
shonguyquicunachö yarpäcuyanqui imayca
jutsata ruracuyänayquipäpis. ¹⁵ Tsay llutancunata
yarparninnam jutsa ruraymanga chäyanqui.
Tsaynö jutsa rurayllachö cawarninmi
infiernuman aywayanqui.

¹⁶ Criyicog mayicuna, tsaynö caycaptina ama
ichicllapis yarpäyaytsu jutsata rurayänayquipä
Tayta Dios yarpapätsiyäshungayquita. ¹⁷ Payga
manam llutancunata ruranantsicpäga

yarpätsimantsictsu. Allillata ruranantsicpämi
yarpätsimantsic. Rupayta, quillata, y
estréllacunatapis Tayta Diosmi camargan.
Tsaymi payga imaypis allillata ruraycan.
18 Imaycatapis allillata rurag carmi alli
willacuyninta musyatsimarguntsic payman
criyicur chasquicunantsicpä. Tsaynö
chasquicogcunatanam salvamarguntsic yapay
yuricushga cuentana car cuyay wamrancuna
canantsicpä.

*Tayta Dios ningancunata cäsucunantsicpä
yätsingan*

19 Señor Jesucristuman criyicog mayicuna,
gamcunaga yachag tucurnin manam alläpa
parlacachäyänayquitsu. Tsaypa rantinga
waquincunapis parlayänanpä upälläcuyänayquim.
Llutallana parlayänayquia rantinmi shumag
yarpachacurirrä imatapis parlayänayqui. Y
nircur imallapitapis llutallaga ama ajäcuyanquitsu.
20 Tsaynö ajäcog runaga Dios munangancunata
manam imatapis ruraycantsu.

21 Runacuna jutsallachö cawayaptinpis gamcu-
naga jutsa rurayniquicunata dejaycuyayna. Jutsa
ruraychö cayänayquia rantinga Tayta Diospa
willacuynin ningannö cawayay. Tsay willacuya
cäsucogcunataga Tayta Diosnintsic tsapanmi
jutsata mana rurayänanpä. 22 Tsaynö caycaptinga
willacuyninta wiwayangayquillachöga ama
ushacätsuntsu, sinöga tsay willacuychö
ningancunata tantiyacur cäsucuyay.

23-24 Tayta Diospa willacuyninta mayarmi tantiyacuntsic jutsa rurag cangantsicta. Tsaynö caycaptinmi paypa willacuyninta mayaycarpis jutsa ruraynintsicta mana dejarga espëjuchö ricurishga cărantsic ganra caycaptinpis gongasqueg cuenta caycantsic. **25** Diosnintsic ningancunata mana gongaypa căsurmi itsanga espëjuchö ricacur cărantsicchö ganrata awicusqueg cuentarä caycantsic. Tsaynö cawagcunataga Tayta Dios imaycachöpis mana dejaypam yanapaycan.

26 Maygayquicunapis “Nogaga Diospa munayninchömi cawaycä” nirnin mana allicunata parlar puriyaptiqui Diosman criyicuyangayquipis manam ni imapä välintsu. **27** Tayta Diosman rasunpa criyicurga muchuy tiempu pobricunata y viüdacunata yanapayay. Jutsa rurag runacunanöga ama jutsallachö cawayaytsu.

2

Pobricunata imapäpis mana cuentar cayänanta yätsingan

1 Criyicog mayicuna, imaycawan munayyog Señor Jesucristuman rasunpa criyicog carga pitapis ama mana välegpäga cuentayaytsu. **2-3** Gamicuna Tayta Diosman mañacucuyänayquichö gorícar juc rícu runa alli röpashga öruplica sortijapäcushga chämuptin allin cag bancumanrämi jamaratsiyánqui. Ratasgaya shgalla röpan jatishga pobri runa chämuptinmi itsanga niyanqui: “Gamga gepallachö cacuy” o “Washa uran jamacuy” nirnin. **4** ¿Imanirtä rícu cagcunata tsaynö alli ricar pobricunataga ni imapäpis mana

cuentayanquitsu? Tsaynö carga llutancunatam ruraycäyanqui.

⁵ Waugicuna panicuna, manam tsaypis tsaynötsu. Rícu runacunapitapis masmi pobricunaga Tayta Diosman criyicur yäracuyan. Paycunatam ciëluchö listangan herenciata Tayta Dios entreganga. ⁶ Tsaynö caycaptinpis gamcunaga pobricunata imapäpis mana cuentarmi rícu cagcunata adular gälacuyanqui. Rícu runacuna ¿manacu roguncunatanö arutsiyäshunqui? Nircurmi magar usharcurrä apatsiyäshunqui autoridäcumamanpis. ⁷ Tsay rícu runacuna ¿manacu salvamagnintsic Señor Jesucristutapis mana imapäpis cuentar cayan?

⁸ Tayta Diospa palabbranchö juc mandamientoga caynömi nican: “Runa mayiquita llapan shonguyquiwan cuyanqui” nir. Tsayta cumplinantsicpä cagtaga Señornintsicpis nirganmi. ⁹ Rícu runacunata adular pobricunata mana alli ricarga tsay mandamientuta mana cumplirmi jutsata ruraycäyanqui.

¹⁰⁻¹¹ Tsaynöpis Tayta Diospa mandamientuncunachöga nicämantsicmi majantsiccunata mana engañanapä y runa mayintsiccunata mana wanutsinapä. Tsay adulteriu jutsata mana rurarpis runa mayintsicta wanutsirga Tayta Diostaga manam ni imapä cäsuycantsictsu. Tsaynö captin waquin mandamientucunata cumplir peru juc mandamientullatapis mana cumplishgaga llapan mandamientutapis mana cumpleg runatanöllam Diosnintsic juzgamäshun. ¹² Tsaynö caycaptinga shumag yarpachacuyay imata parlayänayquipäpis y

imata rurayänayquipäpis. Diospa palabbranchö imanöpis ningannöllam cawaynintsicman Diosnintsic juzgamäshun. ¹³ Runa mayintsicta mana cuyapashgaga fisyu final junag Tayta Dios nogantsictapis mana cuyapaypam castigamäshun. Runa mayintsicta cuyapashgam itsanga Tayta Dios nogantsictapis cuyapämarnintsic salvamäshun.

Tayta Diosman criyir allita ruranantsicpä yätsingan

¹⁴ Señor Jesucristuman criyicog mayicuna, pipis “Tayta Diosmanmi criyicü” nicar pay munanganno mana cawarninga ¿imapäärä criyinganpis välinga? Tsaynö cawag runacunataga Tayta Dios manam salvangatsu. ¹⁵⁻¹⁶ Shumag tantiyacuyay. Diosnintsicman criyicog mayiqui muchuychö cawagta ricaycar mana gararga ¿ima allitatä ruraycäyanqui? Tsaynölla jaticurcunapanä röpan mana capogta ricaycar mana jatircatsirga ¿ima allitatä ruraycäyanqui? ¹⁷ Tayta Diosman criyirpis runa mayiquita mana yanapayaptiquega criyicog cayangayquipis manam ni imapä väliyäshunquitsu.

¹⁸ May waquiniquicunaga caynömi niyanqui: “Tayta Diosman noga criyimi. Tsaymi allita mana allita ruraptipis pay salvamanga” nirnin. ¡Peru manam tsay niyangayquinötsu! Tayta Dios munanganno allicunata mana rurayaptiquega manam imapä väliyäshunquitsu Diosman criyiyangayquipis. ¹⁹ Tayta Dios canganta criyirpis tsay criyingayquillawanga manam salvacuyanquitsu. Supaycunapis criyianmi

Tayta Dios cangantaga. Tsaynö criyirpis infiernuman gaycucäyananpä cagta musyar mantsariywan sicsicyäyanran. ²⁰ ¡Tantiyacuyay! Runa mayiquicunata mana yanapayaptiquega manam imapä väliyäshunquitsu Tayta Diosman criyicuyangayquipis.

²¹⁻²² Tantiyacuyay Abraham imanö cangantapis. Payga Tayta Diosman yäracurmi ningancunata cäsucur cawargan. Tsaymi Tayta Diosta cäsucur tsurin Isaacta altarchö wanutsinanpä pushargan.* Tsaynö cäsucunganpitam Tayta Dios Abrahamta llapan jutsanpita perdonargan. ²³ Tsaytaga Diospa palabran gellgaranganchöpis caynömi nican: “Tayta Diosman yäracuptinmi Abrahamta jutsaynagtana chasquirgan” nir. Y nircur runacunapis niyanmi Tayta Dioswan Abraham cuyanacunganta. ²⁴ Tsaynö caycaptinga Tayta Dios ningancunata mana cäsucurga payman criyicurpis manam salvacionta tarintsictsu. Payman criyicur nimangantsiccunata cumplishgam itsanga Tayta Dios perdonamarnintsc salvamantsic.

²⁵ Tsaynöpis tantiyacuyay unay Rahab jutiyog jutsasapa warmi imata rurangantapis. Tayta Diospa cachan Israel runacuna Jerico marcaman musyapacog aywagtam tsay warmi pacargan wanutsiyäyanpä cagpita. Nircurmi jucläpa yargatsirgan geshpicuyäyanpä. Criyicog cayninanwan tsaynö allita ruranganpitam tsay warmitapis

* **2:21-22** Abrahampita mastा musyanayquipä liyinqui Genesis 22.1-19.

Tayta Dios perdonargan.[†]

²⁶ Tsaynö caycaptinga Tayta Dios munangannö mana cawashgaga payman criyingantsicpis manam välimantsictsu.

3

LLuta imatapis mana parlacunantsicpä ningan

¹ Criyicog mayicuna, yachatsicogcuna llutancunata yachatsicuyaptinga Tayta Diosmi juzganga. Tsaynö captin ama llapayqui yachatsicog cayllaman churacäyaytsu.

² Pipis shiminta sujitarurga jutsa rurayman manam alläpa chantsu. Tsaynö captinpis manam pipis cantsu allillata parlagga. Llapantsicpis imaycallatapis llutancunataga parlaycantsicmi y ruraycantsicmi. ³ Musyayangayquinöpis cawallutapis ichiclla frénuta shiminman churaparcumri dominayan munanganpa puritsiyänänpä. ⁴ Tsaynömi jatuncaray büquita vientu cayläman wacläman apaptinpis tacsha timunllawan manijar puritsiyan munayanganpa aywananpä. ⁵⁻⁶ Tsaynöllam shimintsicpis ichiclla caycar dominamantsic llutan parlaycunawan. Tsaymi mana alli parlaynintsicwanga imaycatapis nina rupar ushagnö caycantsic. Ichic chispa jinapä muntiman rataycur muntita rupar ushagnömi nogantsicpis runa mayintsicta shimintsicwan alli cawacog runatapis mana alli cawayman tigratsintsic. Tsaynö carnin shimintsicpitam chiquipashgapis cantsic. Tsaymi

[†] **2:25** Rahab jutiyog warmi ima rurangantapis masta musyanayquipä liyinqui Josue 2.1-21.

llutancunata parlarga Satanas munangancunata rurar cawaycantsic.

⁷ Ima ashmatapis runacuna manshuyätsiyta yachayanmi, chucarutapis, päregcunatapis, culebracunatapis, y lamar rurinchö cagcunatapis.

⁸ Peru shimintam itsanga pipis sujitya puëdintsu. Llutancunata parlangantsicwanmi runa mayintsiccunata mana alli cawaymanpis churantsic. ⁹ Tsay shimintsicllawanmi Tayta Diospa jutintapis jayarintsic y runa mayintsicpäpis llutancunata parlar purintsic, Tayta Dios runata quiquin niragllata camashga caycaptinträ.

¹⁰ Tsay shimintsicwanmi allitapis mana allitapis parlantsic. Criyicog mayicuna, ama tsaynöga cashuntsu. ¹¹ Tantiyacuyay. Manam juc pucyullapitaga yargamuntsu asgag yacuwan mishqueg yacoga. ¹² Tsaynömi hïgus jachapis mana wayuntsu acëtünastaga, ni üvapis manam wayuntsu hïgustaga. Tsaynöpis manam juc pucyullapita yargamuntsu puchgog yacuwan mishqueg yacoga. [Tsaynö caycaptingga ¿imanirtä allillata parlanantsicpa rantin mana allicunata parlar purintsic?]

Tayta Diospita yachacogcuna shumag cawayänanpä yätsingan

¹³ Maygayquipis Tayta Diospita yachacushga caycarga piwan maywanpis pay munangannö shumag cawayay. Pitapis yanapaycur ama alabacuyaytsu. ¹⁴ Runa mayiquita chiquir shonguyquicunachö nanapararga Tayta Diospa willacuynin ninganta manam cäsucäyanquitsu.

¹⁵ Tsaynö carga Diosta mana cäsucog runacuna cawayangannömi y supay munanganta rurag runacunänömi cawaycäyanqui. ¹⁶ Maychöpis runacuna chiquinacur nanaparänacur cawarmi Tayta Diosta mana cäsucuypa imayca jutsa ruraymanpis chaycäyanlla.

¹⁷ Tayta Diospita rasunpa yachacuyangayquega musyacanga pay munanganman cawayaptiquirämi. Tayta Dios munangannö cawarga runa mayiquicunawan alli cawayanqui, yanapacog cayanqui, ama nanag shimipa imatapis niyanquitsu, cuyapäcog cayanqui, pita maytapis alli ricayanqui, rasun cagllata parlayanqui, y allicunata rurar cawayanqui. ¹⁸ Tsaynö cawayaptiquim juccunapis ricayäshurniqui tantiyacuyanga piwan maywanpis alli cawar Tayta Dios munangannö cawayänanpä.

4

Jutsata mana ruraypa cawanantscipä yätsingan

¹⁻² Criyicog mayicuna, gamcunaga mana alli yarpayyog carmi juccunapa imancunapäpis raycur chiquinacuyanqui, pelyayanqui, wanutsinacuyanqui. Tsaynö cayänayquipa rantinga Tayta Diosmanmi mañacuyanquiman ima miñishtiyangayquitapis tariyänayquipä. ³ Nagana mañacurnam mañacuyanqui manacagcunachö ushayänayquipä. Tsaymi Tayta Diosga mana yanapayäshunquitsu.

⁴ ¡Diosta mana yarpag runacuna! Manacagcunata ruraycarga ¿imanirtä yarpäyanqui Tayta Dios munangannö allita rurar cawaycäyangayquita? Mana allicunata rurarga Tayta Diospa contranmi

caycäyanqui. ⁵ ¿Manacu yarpäyanqui Diospa palabbranchö gellgaraycanganta? Tsaychöga caynömi nican: “Tayta Dios gomangantsic Espiritu Santumi allilla cawanantsicta. Manam munantsu manacagcunata rurar cawanantsictaga” nir.

⁶ Tayta Dios munangannö imaypis cawanantsicpäga quiquinmi imaypis yanapaycämantsic. Palabran gellgaranganchöpis caynömi nican: “Tayta Dios manam yanapantsu yachag tucogcunataga. Payta cäsucur cawagcunatam itsanga cuyapar yanapan” nir.

⁷ Tsaynö caycaptинга Tayta Diosta cäsucur cawayay. Satanas imatapis yarpätsiyäshuptiqui fuerti churacar ama cäsuyaytsu. Mana cäsupäyaptiquega aywacungam. ⁸ Tayta Diosman criyicurninga pay munangannö cawayay. Jutsa ruraypäga ama yarpäyaynatsu. Tsaypa rantinga Tayta Diosta cäsucur cawayay. Tsaynö cawayaptiquega Tayta Dios jutsayquicunapita perdonarmi tantiyatsiyäshunqui jutsata mana ruraypana cawayänayquipä.

⁹ Tayta Diosta mana cäsucuypa cawaycarga ¿imanirtä cushishga cawaycäyanqui? Cushicuyänayquipa rantinga jutsayquicunapita llaquicur wagacuyay. ¹⁰ Tayta Dios munangannö cawayänayquipä payllaman mañacuyay. Tsaynö mañacuyaptiquega imaycachöpis mana dejaypam yanapayäshunqui.

Manajamuräcog canantsicpä yätsingan

11 Criyicog mayicuna, maygayquicunapis ama jamuräcuyanquitsu. Pipis jamuräcog cagga cuyanca-cunantsicpä Tayta Dios nimangantsicta manam imapäpis cuentannatsu. Manam pipis munayyo-gtsu Tayta Dios nimangantsicta mana cäsucuypa cananpäga. Tsaynö cayänayquipa rantinga Tayta Diosta cäsucuyay.

12 Tayta Diosllam munayyogga pitapis alli o mana alli canganta nínampä. Payllam munayyog salvamänantsicpä o infiernuman gaycamänantsicpäpis. Tsaynö caycaptingga gamcuna ñimanatä cayanqui runa mayiquicunata jamuräyanayquipäga?

“Tayta Dios yanapamaptin maychöpis tarishämi” ninantsicpä yätsingan

13 Waquinniquicunaga niyanqui: “Waraycuna aywashun juclä marcapa. Tsaychö juc wata arumushun atsca gelléta tarimunapä” nir. **14** Tsaynö negcunaga shumag wiyacayämä! **15-16** Tsaynö nirninpis gamcuna manam musyayanquitsu waraycuna ima päsayäshunayquipä cagtapis. Pucutay yurircamur illacäregnöllam gamcunapis juc ishcay watacuna cawagllapä caycäyanqui. Tsaymi “Caytam wactam rurashä” nirnin Diosnintsicnöna runa tucuycäyanqui. Tsaynö musyag tucuyänayquipa rantinga niyanquiman: “Tayta Dios yanapamaptinga imaycatapis rurashämi” nirnin.

¹⁷ Tayta Dios munangannö cawayänayquipä canganta musyaycar pay munangannö mana cawarga jutsatam ruraycäyanqui.

5

Mana alli cag rïcucunata Tayta Dios castigananpä ningan

¹ ¡Rïcu runacuna, wiyacuyay cay ningäta! Mana alli cayangayquipitam gamcuna fisyu final junag ñacayanqui. ¡Tsayta tantiyacur wagacuyay! ² Imata goriyangayquipis ismurmi ushacanga. Röpayquicunatapis puyum ushangas. ³ Gamcunaga rïcu cayta munallarmi imaycatapis rurayarguyqui. Cay patsachö rïcu cayaptiquipis fisyu final junagga tsay imayca goriyangayqui gellëniqusuna ni örulyquicuna manam salvayäshunquitsu. Faltapacogcunata yanapayänayquipa rantin quiquillayquicunapä riquëzata goriyangayquipitam infiernuchö rupayanqui.

⁴ Mincayniquicunata mana pägaya arut-siyangayquipitam Tayta Diosta wagapaycäyan. Paycunapa weginpa chaninpitam munayyog Tayta Dios castigayäshunqui. ⁵⁻⁶ Cay patsachöga gamcuna cawayanqui gellëniqusuna captin munayangayquita rurarmi. Tsaynömi masrä rïcuyayta munar imawanpis defiendicuya mana puëdeg runacunata wanutsiyarguyqui. Tsaynö rurar rïcuyäyangayquipitam infiernuman gaycäyanqui. Tsaycunata rurar cayangayquipita gamcunaga pishtaypä cebashga cuchinömi destinashga caycäyanqui.

*Jesucristuta mana ajayaypa shuyacunantsicpä
yätsingan*

⁷ Criyicog mayicuna, Señor Jesucristo cutimunganyag mana ajayaypa pay munangannö cawayay. Musyantsicmi juc chacarëru runa murucungancunata cosichananpä pogunganyagrä shuyaranganta. ⁸ Tsaynömi gamcunapis llapan shonguyquicunawan yäracur Señornintsic Jesucristuta mana ajayaypa shuyacuyänayqui. Payga cutimunapanpäm caycan.

⁹ Waugicuna panicuna, Señorllantsic cutimur runacunata juzgananpä caycaptina ama jamuränacuyaytsu “Cay ricog, wac ricog” nir. Tsaynö runa mayinta jamuragcunataga Tayta Diosmi juzganga.

¹⁰ Yarpäyay Tayta Diospa willacognin unay profëtacuna imanö cawayangantapis. Paycunaga ima ñacacuychö carpis mana ajayaypam Tayta Dios munangannö cawayargan. Tsaynölla gamcunapis ima ñacaycunachö carpis mana ajayaypa Dios munangannö cawayay.

¹¹ Tantiyacushun unay Job* feyupa ñacarpis Tayta Diosman mana ajayaypa yäracunganta. Tsaynö yäracuptimí Tayta Dios cuyapäcog carnin payta yanapargan. Tsaynöllam nogantsictapis Tayta Dios yanapamäshun ima ñacacuychöpis payman yäracullar cawashgaga.

¹² Waugicuna panicuna, imata aunicurpis juraycurrä aunicog cagtaga Tayta Diosmi juzganga. Gmcuna imatapis aunicurga ama

* **5:11** Jobpita musyanayquipä liyinqui Bibliachö “Job” ningan libruta.

imapá jutinchöpis jurayanquirätsu. Aunicurga aunicuyanqui cumpliyänayqui captin. Mana cumpliyänayquipäga ama aunicuyanquitsu.

Tayta Diosman mañacunantsicpä yätsingan

13 Maygayquipis llaquicurga Tayta Diosman mañacuyay yanapayäshunayquipä. Tsaynölla maygayquipis cushishga carga Tayta Diosta agradesicur alabayay.

14 Maygayquipis geshyarga yachatsicog waugicunata gayatsiyämunqui Tayta Diosman mañacapäyäshunayquipä. Paycunanam Jesucristuman yäracur acëtita umayquicunaman wiñapäriyäshur Tayta Diosman mañacuyanga allisquiyänayquipä. **15** Llapan shongunwan yäracur Tayta Diosman mañacuyapterna allisquianquim. Jutsata rurashga carpis Tayta Diosman perdonta mañacuyapterna perdonayäshunquim. **16** Criyicog mayicunawan rimanacushga car perdonanacuyanqui geshyarpis allisquiyänayquipä. Tsaynöpis Tayta Diosman mañacuyay jucniQUI jucniquipäpis. Tayta Dios munangannö cawag runa mañacuptinga mañacungannölla cananpämi yanapanga.

17-18 Tsaynömi proféta Elias mañacungantapis Tayta Dios wiyyargan. Paymi mana tamayamunanpä llapan shongunwan Tayta Diosman mañacurgan. Tsaynö mañacuyuptin manam Tayta Dios tamayata cachämurgantsu quimsa wata jogta quillantin. Tsaypita yapay tamayamunanpä Tayta Diosman mañacuptin

tamyatsimurganmi.[†] Yapay tamyamuptinnam runacunapa murucuynincunapis wayurganna. Elias nogantsicnö runalla caycaptin mañacunganta Tayta Dios wiyaycarga nogantsictapis wiymäshunmi mañacungantsictaga.

19-20 Waugicuna panicuna, Jesucristuta chasquicurcur mayganpis jutsallachörä cawaptinga shumag tantiyatsiyay Jesucristuta imaypis cäsucur cawayänanpä. Tsaynö tantiyatsirmi salvaycäyanqui infiernuman manana gaycucäyänanpä. Tsaynöpam Tayta Diospa perdonninta alcanzayanga.

[†] **5:17-18** Eliaspita mastा musyanayquipä liyinqui 1 Reyes 17.1-pita 18.46-yag.

**Mushog Testamento
New Testament in Quechua, Southern Conchucos
Ancash (PE:qxo:Quechua, Southern Conchucos
Ancash)**

copyright © 2002 Wycliffe Bible Translators, Inc.

Language: Quechua, Southern Conchucos Ancash

Translation by: Wycliffe Bible Translators, Inc.

Quechua, Southern Conchucos Ancash

qxo

Peru

Copyright Information

© 2002, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Quechua, Southern Conchucos Ancash

© 2002, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
f9dc0e05-0d43-5c6e-a9f5-a2adc7198b7a